

A Tx'an Libro

ESDRAS

Is ley cham rey Ciro
(2 Cr 36.22-23)

1 ¹A yet babel abil yoc cham Ciro reyal bay Persia, a Jehová max ak'on yun Ciro tu' watx'nen aj jun is ley, max al-lay el yin k'anejaj, cax max yaontok is k'anejaj jun ley tu' yin unal bay masanil yul is nación. Axca tu' max yuncan el is k'anej Jehová max yalcan el cham Jeremías. Axca ti' yalon jun ley tu': ²A Ciro reyal Persia chi aloni: A Jehová Diosal satcan, max aon oc masanil nacionlak bay sat tx'otx' ti' yul in k'ab. A' max alon ayin tol chin watx'nej aj junok is templo bay Jerusalén yul yet Judá. ³Yuj tu' xin, tzanc'al mactxel ex ex conobal Jehová, colwajokab Jehová e Diosal e yetok. A tinani' asek bay Jerusalén yul yet Judá yuj e ca watx'nen aj is templo Jehová e Diosal, a ton Cham ayic' bay Jerusalén tu'. ⁴Tzanc'al mac ex is conob ex Jehová, ayexto ec' ti', tol chi je' e c'ul e meltzotok bay Jerusalén, chi je' chex toji. Axa eb cajan bay e cawilal tu', colwajokab eb yaontok ch'en oro, ch'en plata yetokc'al tzetak yetal, c'al no iktzom no', cax yak'okab c'apax eb yofrenda yuj templo Dios bay Jerusalén, xi jun ley tu'.

⁵Yuj tu' xan max aj wan eb yajawil xol yinatil Judá c'al xol yinatil Benjamín, masanil eb sacerdote c'al eb levita, a ton eb bay max k'anjab Jehová yin is nabal, tol chi toj eb bay Jerusalén yet chi toj ca watx'nej eb is templo Cham bay tu'. ⁶Axa masanil eb anima cajan is cawilal eb, max yak' eb ch'en oro, ch'en plata, c'al tzetak yetal ay bay eb, yetok no iktzom no', c'al tzetak yetal tol ay is tojol, yetok c'apax juntzanxa ofrenda tol max el wal yin c'ul eb yak'oni. ⁷Ay c'apax juntzan mitx'k'abej yet templo Jehová ibiltek bay Jerusalén yuj Nabucodonosor, aycan octok yuj yul templo is diosal. ⁸Axa Ciro reyal Persia, max alon bay Mitrídates, tesorero yayji, tol chi yieltek juntzan tzet yetal tu', cax chi bisoni, chi yak'on bay Sesbasar, a ton cham ok oc yin gobernadoral bay Judá. ⁹A ton is bisil tzetak yetal ti': 30 mimek sec' oro, mil mimek sec' plata, 29

cuchillo. ¹⁰30 coc'tak sec' oro, 410 coc'tak sec' plata yaynakil yili, yetok junxa mil tzetak yetal. ¹¹5,400 chi cha ba ch'en plata yetok oro yin masanil. A masanil juntzan tu' max yi' meltzoz Sesbasar, yet max paxtek bay Babilonia yetok juntzanxa eb, cax max tojcan bay Jerusalén.

Eb max meltzoztek bay Babilonia

(Neh 7.5-73)

2 ¹⁻²A ton is listail eb yinatil eb titnak bay Judá ti', a ton eb max ilaytok yuj cham Nabucodonosor reyal Babilonia, max lajwi tiempoal yayji ec' eb yin presoal bay tu', max meltzoztok eb bay Jerusalén, c'al bay juntzanxa lugar yul yet Judá. Junjunc'al max apni oc bay is conobal, ikbabil eb yuj eb ti': Zorobabel, Josué, Nehemías, Seraías, Reelaías, Mardoqueo, Bilsán, Mispar, Bigbai, Rehum c'al Baana.

³ A eb yinatil Paros, ay 2,172 eb.

⁴ Eb yet Sefatías, 372 eb.

⁵ Eb yet Ara, 775 eb.

⁶ Eb yet Pahat-moab ma chi yal elapnok eb yet Josué c'al Joab, 2,812 eb.

⁷ Eb yet Elam, 1,254 eb.

⁸ Eb yet Zatu, 945 eb.

⁹ Eb yet Zacai, 760 eb.

¹⁰ Eb yet Binuy, 642 eb.

¹¹ Eb yet Bebai, 623 eb.

¹² Eb yet Azgad, 1,222 eb.

¹³ Eb yet Adonicam, 666 eb.

¹⁴ Eb yet Bigvai, 2,056 eb.

¹⁵ Eb yet Adín, 454 eb.

¹⁶ Eb yet Ater ma Ezequías, 98 eb.

¹⁷ Eb yet Bezai, 323 eb.

¹⁸ Eb yet Jora, 112 eb.

¹⁹ Eb yet Hasum, 223 eb.

²⁰ Eb yet Gibar 95 eb.

²¹ Eb aj Belén, 123 eb.

²² Eb aj Netofa, 56 eb.

²³ Eb aj Anatot, 128 eb.

²⁴ Eb aj Azmavet, 42 eb.

²⁵ Eb aj Quiriat-jeirim, Cafira c'al yet Beerot, 743 eb.

²⁶ Eb aj Ramá c'al aj Geba, 621 eb.

²⁷ Eb aj Micmas, 122 eb.

²⁸ Eb aj Betel c'al eb aj Hai, 223 eb.

²⁹ Eb aj Nebo, 52 eb.

³⁰ Eb aj Magbis, 156 eb.

³¹ Eb aj junxa Elam, 1,254 eb.

³² Eb aj Harim, 320 eb.

³³ Eb aj Lod, Hadid c'al Ono, 725 eb.

³⁴ Eb aj Jericó, 345 eb.

³⁵ Eb aj Senaa, 3,630 eb.

³⁶ Eb sacerdote eb yinatil Jedaías, a ton eb tu' is yinatil Josué, 973 eb.

³⁷ Eb yinatil Imer, 1,052 eb.

³⁸ Eb yet Pasur, 1,247 eb.

³⁹ Eb yet Harim, 1,017 eb.

⁴⁰ Eb levita yinatil Josué, c'al eb yet Cadmiel, a eb tu' yinatil c'apax Hodavías eb, ay 74 eb.

⁴¹ Eb yinatil Asaf chi bitni, 128 eb yin masanil.

⁴² Eb taynem puerta a ton eb yinatil Salum, eb yet Ater, eb yet Talmón, eb yet Acub, eb yet Hatita c'al eb yet Sobai, 139 eb yin masanil.

⁴³ A eb chi ak'wi serbil bay templo, a ton eb yinatil Ziha, eb yet Hasufa, eb yet Tabaot, ⁴⁴ eb yet Queros, eb yet Siaha, eb yet Padón, ⁴⁵ eb yet Lebana, eb yet Hagaba, eb yet Acub, ⁴⁶ eb yet Hagab, eb yet Salmai, eb yet Hanán, ⁴⁷ eb yet Gidel, eb yet Gahar, eb yet Reaía, ⁴⁸ eb yet Rezín, eb yet Necoda, eb yet Gazam, ⁴⁹ eb yet Usa, eb yet Paseah, eb yet Besai, ⁵⁰ eb yet Asena, eb yet Meunim, eb yet Nefusim, ⁵¹ eb yet Bacbuc, eb yet Hacufa, eb yet Harhur, ⁵² eb yet Bazlut, eb yet Mehida, eb yet Harsa, ⁵³ eb yet Barcos, eb yet Sísara, eb yet Tema, ⁵⁴ eb yet Nezía c'al yetok eb yet Hatifa.

⁵⁵ A mac ay yinatil eb max ak'on serbil cham Salomón, a ton eb yinatil Sotai, eb yet Soferet, eb yet Peruda, ⁵⁶ eb yet Jaala, eb yet Darcón, eb yet Gidel, ⁵⁷ eb yet Sefatías, eb yet Hatil, eb yet Poqueret-hazebaim, yetokc'al eb yet Amón. ⁵⁸ A masanil eb chi ak'wi serbil bay templo, c'al yetok eb yinatil eb yak'omal serbil Salomón, ay 392 eb yin masanil.

⁵⁹⁻⁶⁰ Ay 652 eb yinatil Delaía, Tobías c'al Necoda. Max tit eb bay Tel-mela, Tel-harsa, Querub, Adón c'al Imer. A eb tu', maj je' tx'oxon el ba eb tatol israel eb yuj yinatil, ma toc'al ay yuj ba eb.

⁶¹⁻⁶² A eb yinatil Habaía, Cos c'al Barzilai max yal eb tol sacerdote eb, palta maj ilchaj junok un bay chi txe cloji tatol yinatil eb sacerdote eb. Yuj tu' xan maj chalay oc eb yin opiso yin sacerdoteal. (A jun chi al-lay Barzilai-il tu', max nupay yetok is cutz'in jun cham aj Galaad chi yik Barzilai, xan a bi is ni' tu' max yikcan ajok.) ⁶³ Max yal cham gobernador tol c'am chi lo eb loj tol yet Dios yayji ocok, masantac'al ok yal junok sat sacerdote tzet ok yun yelapnok yet ok yilon Urim c'al Tumim.

⁶⁴ Ay 42,360 eb anima tu' yin masanil, ⁶⁵ c'am chi oc eb nak mosejal c'al eb ix mosejal tz'akilok. A eb tu' ay 7,337 eb yin masanil, ay c'apax 200 eb winak c'al eb ix ix chi bitni. ⁶⁶ Ay c'apax 736 no caballo c'al 245 no mula. ⁶⁷ Ay c'apax 435 no camello, c'al 6,720 no burro.

⁶⁸Ay juntzanok eb yajaw yayji xol eb yican. A yet max apni oc eb bay templo Jehová bay Jerusalén, max yak' eb is sabal yuj ca wats'nelay aj templo tu', bay ayic' yet payxa. ⁶⁹Max yak'on eb colwal yuj ca wats'nelay aj templo atac'ala' jantak tzet yetal ay yul k'ab eb. Max yak' eb 1,030 libra ch'en oro, ay c'apax 5,740 libra ch'en plata yetok 100 an jokan pichilej yet eb sacerdote.

⁷⁰A eb sacerdote, eb levita, yetokc'al juntzan eb conob, chi yal elapnok eb chi bitni, eb taynem puerta, c'al eb chi ak'wi serbil bay templo max cajay bay is conob junjun. Max cajay c'apax juntzanxa eb bay is conob junjun.

Max ca wats'ji pax oc culto

3 ¹Maxax wats'nej pax ay ba eb israel bay yul is conobal junelxa, axa yet max tz'aknaj yet is suk xajaw, masanil conob max wajbaj oc ba bay Jerusalén. ²Yuj tu' xan max aj wan cham Josué c'ajol Josadac, yetok juntzanxa eb sacerdote, yetok cham Zorobabel c'ajol Salatiel, c'al yetok eb yican. Max wats'nen aj eb altar yet Jehová is Diosal eb, yuj yak'on eb xajanbal yiban altar tu', axca yaloncan bay ley cham Moisés is chekbej Dios. ³Caxc'al max xiw eb bay eb conob cajan bay is cawilal, palta caw wal wats' max yut wats'nen aj eb jun altar tu'. Junjun k'inibalil c'al junjun yayc'ualil max yak' tz'a eb xajanbal yiban altar tu', yuj yilay aj can Jehová yuj eb. ⁴Cax max chaon eb k'in yet chinama, max yak'on eb xajanbal yet junjun c'u, atac'ala' yaloncan yul tx'an yunal ley. ⁵Max yak'on c'apax eb xajanbal chi tz'a yet junjun c'u, yuj k'in yet unin xajaw, yuj k'in chi chalay yet junjun abil bay Jehová. A mac chi el yin is c'ul cax chi yak'on xajanbal bay Cham yet tzanc'al tzet tiempoal. ⁶A yet babel c'ual yet is suk xajaw max chaon el eb yich yak'on xajanbal chi tz'a'i caxc'al c'amto chi ay yich templo Jehová. ⁷Cax max yak'on eb tumin bay eb albañil, c'al bay eb josom te'. Max yak'on c'apax eb loj, vino, c'al aceite bay eb aj Sidón, c'al bay eb aj Tiro yuj yiontek eb te c'ute' bay Líbano, cax chi oc te' yiban a' mar masantac'al chi apni oc bay Jope, atac'ala' max yun yalon Ciro rey al Persia.

Max chalay oc wats'ji templo

⁸Max chalay oc ca wats'nelay templo yuj Zorobabel c'ajol Salatiel, Josué c'ajol Josadac, c'al yetok eb sacerdote, eb levita, c'al yetok masanil eb max paxtek bay Babilonia. Yin is cab xajaw yet cab abilxa jayoc eb bay Jerusalén, max chaon oc eb mulnaj yin templo Jehová, cax max yaon oc eb jun mulnajil tu' yul is k'ab eb levita, eb ec'banxa 20 abil is k'inal. ⁹A jun levita chi yik Josué, c'al eb is c'ajol, c'al eb yuxtak, a Cadmiel c'al eb is c'ajol, yetokc'al eb yinatil Judá, junejxac'al max yut ba eb. Max oc eb yin ikbajwomal yin mulnajil yuj ca wats'jubal aj templo, cax max colwaj c'apax eb levita yinatil Henadad, c'al eb yican ba yetok eb.

¹⁰A yet max yaon ay eb albañil yich templo Jehová tu', max aj lecan eb sacerdote, ayoc is pichil eb yet is sacerdotéal, cax ibil oc is trompeta

eb yuj. Axa eb levita yinatil Asaf, ibil oc platillo yuj eb, cax chi bitni eb bay Jehová, axca yaloncan cham David reyalben Israel. ¹¹Ay mac chi bitni, ay pax mac chi tak'wi: Jalek yuj diosal bay Jehová yujtol yelxac'al watz' Cham, yujtol caw wal ochebil on ayon israel on ti' yuj Cham yin tojbalk'inal, xi masanil anima. Chi el yaw eb yin tzalojc'ulalil cax chi c'oli bitni eb bay Jehová yujtol mayal el yich templo. ¹²Cax xiwil eb sacerdote c'al eb levita c'al eb yajawil conob, tol ichamtak winaxxac'al el eb, tol yilnak eb jun templo yet babelal, caw wal yip eb yel yaw yok'i, yuj chi yil eb yel yich junxa ac' templo ti'. Xiwil c'apax mac chi el yaw yuj tzalojc'ulal. ¹³C'amxa mac chi nachaj el yuj tzet chi uji. Ay mactxel chi ok'i, ay mac chi awji yuj tzalojc'ulal, caw wal yip eb yel yaw, najatta chi ablay weklabi eb.

A eb ajc'ul max tenoc wanaj eb mulnajil

4 ¹A yet max yaben aj eb ajc'ul yin Judá, c'al yin Benjamín, tol mayal meltzojtek eb max ilaytok yin presoal bay Babilonia, tol lananxa ca watz'nen aj eb is templo Jehová Diosal Israel, ²max toj il-lay cham Zorobabel yuj eb, c'al eb yajaw yayji xol yican. Max yalon eb axca ti':

—Matawal chi el yin e c'ul che cha' co colwal e yetok yin ca watz'nebilal aj mulnajil ti', yujtol chi ja c'apax oc co ba yin ayilal bay e Diosal axca ex ayex ti'. Ataxc'al yet max on ilaytek cayti' yuj Esar-hadón, a ton reyal Asiria, atax yet tu' max c'oli jak'on co xajanbal bay e Diosal tu', xi eb.

³Palta max tak'wi Zorobabel yetok Josué, c'al yetok juntzan eb yajaw yayji xol yican, max yalon eb axca ti':

—C'am e yalon e yet yin ca watz'nebilal aj is templo co Diosal on. Asan on ayon ti' ok co ca watz'nej aj bay Jehová, co Diosal ayon israel on ti', yujtol caytu' max yun yalon Ciro reyal Persia, xi eb.

⁴Yuj tu' max oc ijan eb ajc'ul tu' yak'on cabax aj c'ul c'al xiwaj masanil eb cajan bay Judá yet watz' c'amxa chi ca watz'nen aj eb jun templo tu'. ⁵Max yak' eb montebal tumin bay juntzan eb mimek yopiso xol eb persa, yet watz' chi tenoc wanaj eb ca watz'nelay aj templo tu'. Cayc'al tu' max yut eb yet ayoc Ciro yin reyal bay Persia, masantac'al yul is tiempoal rey Darío. ⁶A ton yet max chaon c'apax el Asuero yak'on reyal, max ak'wi queja eb yin eb cajan bay Judá c'al bay Jerusalén. ⁷A yul is tiempoal Artajerjes reyal Persia, a Bislam, Mitrídates, Tabeel yetokc'al juntzanxa ajun yetok, max tz'ibej eb junok un bay cham Artajerjes. A tx'an un tu' max tz'ibelay yin arameo c'al yin letrail arameo. ⁸A Rehum cham comandante, yetokc'al Simsai cham ajtz'ib, a ton eb tu' max watz'nen jun carta yuj yak'llay queja eb cajyom bay Jerusalén bay rey Artajerjes. ⁹A ton tx'an carta ti' max yatok eb cawan tu' yetokc'al eb ajun yetok eb, a ton eb yajaw yayji, c'al eb ay yikbej titnak bay Persia, bay Erec, bay Babilonia, c'al bay Susa, yul makbej Elam, ¹⁰yetokc'al bay juntzanokxa nación. A ton eb max ilay eltek bay is conobal yuj Asnapar tol mimanbil, max ilaytok

eb yuj bay conob Samaria, c'al bay juntzanokxa conob bay yetc'ulal yayubc'ual a' Éufrates. ¹¹Max yal tx'an un axca ti':

Ayon a chekbej on, cajan on bay yetc'ulal yayubc'ual a' aej Éufrates chi co tz'ibej jun un ti' ayach mamin rey Artajerjes:

¹²Chi jaltok ayach mamin rey, tol a eb judío max a bekil yul juntzanxa a makbej, max jayoc eb tac'al bay Jerusalén, cax chi ca watax'nen aj eb jun conob tenomtak tol yelxac'al yob. Mayal chail eb yich watax'nen aj muralla, toxa ok lajwok yuj eb. ¹³Chi jalon c'apaxtok ayach mamin rey, tatol a jun conob tu' ok ca watax'nelay ajok, c'al watax'ji aj is murallail, a juntzan anima tu' manxa ok yak' eb tojlalab, tamwal waj tumin ayach. Yuj tu' majxa oc tumin bay a tesorería. ¹⁴Yujtol ayon ti', ayon oc ach jak'on serbil mamin rey, c'am chi yochej co c'ul tol axca tu' ok ach utlayok, yuj tu' xan chi jaltok juntzan ti' ayach mamin rey, ¹⁵yet chi saylay il bay yul archivo yet eb echmam. A bay tu' ok el mamin rey, yuj tzet chi jaltok ti', cax ok nachaj el oj, tol a jun conob tu' caw wal tenomtak, tol ay is may yin eb rey, c'al yin juntzanxa conob, tol a yuj max waj ba eb yin tenomtakilal, xan max uchlay lajwok jun conob tu'. ¹⁶Yuj wal tu xin, xan chi jaltok ayach mamin rey, tatol chi ca watax'nelay aj jun conob ti', a yet ok watax'jok wal oc is murallail, axa yel ekbej bay yetc'ulal bay yayubc'ual a' Éufrates ti', xitok eb bay cham.

¹⁷Lajwi tu xin, max yaontek cham rey Artajerjes paktzebal k'anej eb tu' axca ti':

Ach comandante Rehum, c'al ach Simsai ajtz'ib, yetokc'al eb ajun e yetok bay Samaria c'al bay juntzanokxa conob bay yetc'ulal yayubc'ual a' Éufrates, chi wak' cawil e c'ul.

¹⁸A tx'an un max e yatek ayin, watax' max yun yawtelay aj tx'an c'al coc'alnelay el in satak. ¹⁹Max wala' tol chi saylay il-layok. Max ton ilchaj xin, tol a jun conob Jerusalén tu', caw wal tenomtak max yut ba bay eb rey yet yalantok, max wajbaj oc ba eb yin tenomtakil yin eb rey tu'. ²⁰A yet tu' ay eb reyal Jerusalén caw wal jalan, max ayji yikbej yiban tx'otx' tx'otx' bay yetc'ulal yayubc'ual a' Éufrates, max tojlanej eb anima bay tu' tojlalab c'al waj tumin bay eb. ²¹Yuj tu' xan alek bay juntzan winak tu' tol chi oc wanaj eb yin mulnajil tu', masantac'al ayin ok wala'. C'amto okabc'al chi ca watax'nelay aj jun conob tu'. ²²Man toc'alok che yiloc jun tu' yet watax' c'am chi etax el yul co makbej ti', xitok cham rey.

²³A yet max awtelay aj tx'an carta cham rey Artajerjes satak cham comandante Rehum, c'al satak cham ajtz'ib Simsai, c'al satak eb ajun yetok eb, max toj eb masanil yin aymanil bay Jerusalén, max bet eb yak'on plural eb judío yoc wanaj yin mulnajil. ²⁴Caytu' max yun yoccan waan ca watax'nelay aj templo Dios bay Jerusalén, masantac'al yet is cab abil yoc Darío yin reyal bay Persia.

Max ca watx'nelay templo

5 ¹A eb is chekbej Jehová Dios, a ton Hageo, c'al Zacarías is c'ajol Iddo, max oc ijan eb yalon bay eb aj Judá, yetokc'al bay eb aj Jerusalén, tzet chi yal Jehová is Diosal bay eb. ²Yuj tu xin, max oc Zorobabel is c'ajol Salatiel, c'al Josué is c'ajol Josadac, yin mulnajil junelxa yin ca watx'nen templo Dios bay Jerusalén, cax max oc eb chekbej Dios yiptzen eb. ³Axa pax Tatnai gobernador yayji bay yayubc'ual a' Éufrates, c'al Setar-boznai yetok eb yetbi ba yetok, max bet eb yala': ¿Mac max alon ayex tatol che ca watx'nej jun templo ti', cax che yaon c'apax oc is teal? ⁴¿Tzet is bi eb chi watx'nen jun miman na ti'? ¿xi eb. ⁵A Dios max occ'al yetok eb israel ayoc yin ikbajwomal tu', xan maj tenlay oc wanaj eb mulnajwom yuj cham gobernador yetok eb ajun yetok. Asan tol max tz'ibejtok eb junok un bay cham rey Darío, cax max yechbanen eb tzet xi cham.

⁶A ton jun ti' is copiail tx'an carta max yatok Tatnai gobernador bay cham rey Darío, c'al pax Setar-boznai, c'al eb yet gubernadoral, a ton eb yajaw yayji bay yayubc'ual a' Éufrates tu'. ⁷Axca ti' max yun yaloni:

Chi yochej co c'ul on mamin rey, tol watx'c'ulalokab ayach. ⁸A wal jun ti' chi jaoc yul a k'ab. Max on betic' bay Judá, max jilon is templo cham Dios, cham miman yayjiocok, tol lanan ca watx'nelayi. Ayoc mimek josbil ch'en yin, yetokc'al te mimek patzab. Caw wal yelc'ulal yak'on eb, xan lananxa watx'ji yuj eb. ⁹Max co k'anlej bay eb israel tu' mac max chekon eb, xan chi watx'nej eb, c'al yaon oc eb is patzabil, ¹⁰c'al tzetak is bi eb yajaw yayji oc yin tu', cax ok co tz'ibentok ayach jaloni. ¹¹Max yalon eb ayon: Tolab chi oc eb ayilal bay Dios aj satcan, c'al aj sat tx'otx' ti', xan lanan ca watx'nen aj eb jun templo max watx'nej jun miman rey bay Israel yet payxa. ¹²Max yalon eb tol a eb is yichmam eb max tx'emontek yowal c'ul cham Dios aj satcan. Yuj tu' xan, a Cham max aon oc eb yul is k'ab cham Nabucodonosor, reyal Babilonia, yinatil eb caldeo. A' max uchon ay jun templo tu', cax max yiontok eb anima bay Babilonia. ¹³Yinxá tzunanil, yet max oc Ciro yin reyal bay Babilonia, max chekon cham tol chi ca watx'nelay aj jun templo tu'.

¹⁴Max yak'on cham rey Ciro juntzan net tol oro c'al plata junelxa, juntzan max yitok Nabucodonosor bay is templo Dios bay Jerusalén, cax max yaon octok bay templo is diosal. Max yak'on cham rey Ciro tu' juntzan net tu' bay Sesbasar, a ton cham max aon oc yin gubernadoral bay Jerusalén. ¹⁵Max yalon cham rey Ciro bay Sesbasar, tol chi yitok juntzan net tol oro tu' yuj yaon octok yul templo, cax chi ca watx'nelay templo Dios bay Jerusalén bay ayc'alta'a. ¹⁶Catatu' max apni oc Sesbasar, cax max yaon ay yich is templo Dios bay Jerusalén. Ataxc'al yet tu' max chail yich ca watx'nelayi, cax c'amtoc'al chi lajwi tinani'.

¹⁷Yuj wal tu xin, chi co k'an ayach tol chi saylay yulak archivo bay palacio Babilonia tu', ta yel max chek cham rey Ciro tol chi ca watx'ji is templo Dios bay Jerusalén tu'. Lajwi tu' cax chalon jabej tzet xi a nabal yin jun ti', xitok eb yin is yun tu'.

6 ¹Max yalon cham rey Darío tol chi saylay bay yulak archivo bay Babilonia bay chi c'ubelay masanil un ay yopiso. ²Palta a bay yul palacio bay conob Ecbatana, bay yul yet Media, a tu' max ilchaj jun un bay tz'ibbilcan tzet yetal nabilcanok, bay chi yal axca ti':

³A yet babel abil yoc Ciro yin reyal, max yaloni: A yuj is templo Dios bay Jerusalén: Watx'nelayokab ay yich cax chi watx'ji aj templo yuj yak'lay xajanbal yul; 27 metro chi aj tel can, ac'ala' 27 metro chi yun c'apax yul txiquin. ⁴Ox txol mimek ch'en josbil, chi oc yin, cax chi oc jun txolok te te' caw wal ac' yiban. A bay is tesorería cham rey chi eltek is gastoal. ⁵Axa juntzan net tol oro c'al plata ibiltek bay yul templo bay Jerusalén yuj Nabucodonosor, max yitek bay Babilonia ti', ilayokab meltzoj bay templo bay Jerusalén, cax chi alay octok bay yul yatut Dios, bayc'alta' ayic'ok, xi cham, xi jun chekbanilej tu'.

⁶Lajwi tu' max chekon cham rey Darío yal-lay bay Tatnai gobernador bay yayubc'ual a' Éufrates, c'al bay Setar-boznai c'al bay eb yetbi ba yetok, a ton eb ayoc yin opiso bay jun lugar tu' axca ti':

Besek el e ba bay templo tu', ⁷cax manchak e tenchanej is gubernadoral eb israel, c'al eb ikbajwom yayji oc yin watx'jubal aj templo Dios bayc'alta' ay is lugar. ⁸Ayin chi wala' tol chex colwaj yetok eb israel ayoc ikbajwomal yuj watx'jubal aj templo Dios, chi tojlanelay is gastoal yuj ch'en tumin chi chalay yuj tojlalab bay yayubc'ual a' Éufrates, c'amokab chi ec' tiempo yak'layi, yet watx' c'am chi oc wanaj yoc mulnajil. ⁹Masanil tzet chi oc yopiso junjun c'u, c'amokab chi majax aj bay eb sacerdote ayic' bay Jerusalén, axca chi yun k'anon eb: no ach'ej wacax, ma no icham calnel, ma no ach'ej calnel, yet chi oc no' yin xajanbalil bay Cham Diosal satcan, yetok c'apax trigo, atz'am, vino, c'al aceite, ¹⁰yuj yak'lay xajanbal chi yochej Dios, c'al k'anlay in cawil yetok wuninal.

¹¹Ayin chi wal c'apaxok, ta ay mac chi tenon jun tzet chi wal ti', chi ilay aytek junok patzabil is yatut, cax chi locbelay oc bay xial chon te', axa yatut tu' chi cancan axca bay chi bul-lay k'alem. ¹²A Dios max sic'on el Jerusalén yet chi oc ayilal bay tu'; yuj tu' aokab chi c'ayon el eb rey, c'al is nación eb chi tenon jun k'anej chi wal ti', ma chi yetnejtok jun is templo bay Jerusalén tu'. Ayin Darío in ti', chi wak' jun chekbanilej ti', yowalil chi ikelay yin aymanil masanil tzet chi tz'ibbelaycan ti', xi jun un tu'.

Max lajwi watx'ji templo

¹³Yuj tu', a Tatnai gobernador bay yayubc'ual a' Éufrates, c'al Setarboznai, c'al eb yetbi ba yetok, max oc eb yin yikeni, axca yalontek cham rey Darío. ¹⁴Yuj tu xin, a eb israel ikbajwom yayji oc yin mulnajil tu', max je' yuj eb lajoncan watx'ji templo axca max yun yalon eb cham chekbej Dios, a ton Hageo c'al Zacarías c'ajol Iddo. Caytu' max yun lajwican watx'ji templo axca max yun yalon Jehová is Diosal Israel, c'al axca chekbanilej yet eb reyal Persia, a ton cham Ciro, cham Darío, c'al cham Artajerjes. ¹⁵Oxebxa c'ual waay xajaw Adar yet-xa is wak abil yoc Darío yin reyal bay Persia max lajwi watx'ji templo tu'.

¹⁶A eb israel, mawal eb sacerdote, c'al eb levita yetok masanil eb paxnaktek bay Babilonia max cha eb k'in al templo Dios yin tzalojc'ulal. ¹⁷A yet jun tiempoal tu' max yak' eb xajanbal: 100 no ach'ej wacax, 200 no icham calnel, 400 no ach'ej calnel, c'al lajcawc'on no mam chiwo, junjun no chiwo tu' yet junjun tribual eb israel, yet chi tancan el is mul masanil conob. ¹⁸Max lajwi tu xin, cax max alay oc eb sacerdote yin is turno, axa junjun makquiltakil eb levita max oc eb yin yopiso bay templo Dios bay Jerusalén axca yayjican bay tx'an un yet cham Moisés.

¹⁹Max cha' c'apax eb meltzojnaktek bay Babilonia, k'in Pascua yet 14 waay babel xajaw. ²⁰Maxax watx'nej ba eb sacerdote c'al eb levita, atac'ala' yalon ley. Yuj tu' xan a masanil eb watx'xa yayji. Axa mak'on cam eb levita no xajanbal yet Pascua yuj masanil eb meltzojnaktek bay Babilonia, a ton eb yet conob eb, c'al eb sacerdote, yetokc'al eb yet levitail ba. ²¹Masanil eb israel meltzojnaktek bay Babilonia, max chi' eb no xajanbal yet Pascua tu'. Ac'ala' masanil eb max yaoc ba yetok eb, a ton eb max yiel ba yin is yobtakil eb anima cajan bay yinlak eb, max wajbaj oc ba eb yetok eb israel yuj yoc eb yin ayilal bay Jehová is Diosal Israel tu'. ²²Yin ukeb c'ual ayoc eb yin tzalojc'ulal yuj chaon eb k'in yet ixim pan c'am yich ayocok, yujtol a Jehová max aon oc tzalojc'ulal yin is nabal eb, yujtol max k'anjab Dios yin is nabal cham reyal Asiria yuj colwaj yin watx'jubal templo is Diosal Israel.

Max apni oc Esdras bay Jerusalén

7 ¹Max lajwi tu xin, a yet ayoc Artajerjes yin reyal bay Persia, a yet tu' ay jun winak chi yik Esdras. A ton eb is yichmam ti': Seraías, Azarías, Hilcías, ²Salum, Sadoc, Ahitob, ³Amarías, Azarías, Meraiot, ⁴Zeraías, Uzi, Buqui, ⁵Abisúa, Finees, Eleazar, c'al Aarón a ton cham babel sacerdote. ⁶Mextol yayji Esdras ti' yin is ley Jehová is Diosal Israel, a ton jun ley yak'nak Jehová bay cham Moisés. Yujtol max colwaj Jehová yetok, xan max yak' rey Artajerjes masanil tzet max k'ana'. Lajwi tu' max meltzojte Esdras bay Babilonia. ⁷Max jayoc bay Jerusalén yetok jun bulan eb yet israelal, eb sacerdote, eb levita, eb chi bitni, eb taynem puerta, c'al yetok eb chekbej yet

templo. Max uj jun ti' yet ukebxa abil yoc Artajerjes yin reyal. ⁸⁻⁹Max colwaj is watx'c'ulal Dios yetok, xan max tit bay Babilonia yet wal babel c'ual, yet babel xajaw, yet ukeb abil yoc Artajerjes yin reyal. Max apni oc bay Jerusalén yet babel c'ual yet is so' xajaw yet is suk abil tu'. ¹⁰A wal is nabal Esdras tol ok cuy wal is ley Dios, c'al beybalneni, cax ok cuylay eb israel tu' yuj yin ley tu'.

¹¹A ton jun is copiaiil tx'an un max yak' cham rey Artajerjes bay Esdras sacerdote, tol cuywinak yin is ley Jehová, c'al is chekbanil ak'bil bay Israel:

¹²Ayin Artajerjes in, reyal in eb rey, chi wak' cawil a c'ul, ach Esdras, sacerdote c'al meñtol ach, caw wal cuywinak ach yin ley cham Diosal satcan.

¹³Max walil bay masanil eb israel ayic' bay yul in makbej ti', ta chi je' c'ul eb toj bay Jerusalén etok, mawal axca eb sacerdote ma eb levita, tokokab eb. ¹⁴Ayin ti', yetok eb ukwan chi lajtinen k'anej wetok, chach jatok ela' tzetbil wal yayji bay Judá c'al bay Jerusalén tu', ta axca yalon is ley a Diosal ayoc yul a k'ab tu', caytu' yayji. ¹⁵Itok ch'en plata c'al ch'en oro chi el yin co c'ul on jaontok bay e Diosal ayex israel ex tu', Cham ay is templo bay Jerusalén tu'. ¹⁶I c'apaxtok masanil ch'en plata, c'al masanil ch'en oro cha cha' bay eb anima bay yul yet Babilonia tu', c'al jantak tzet chi el yin c'ul eb et israelal, c'al eb sacerdote yak'on yuj templo e Diosal bay Jerusalén tu'. ¹⁷A yuj ch'en tumin tu' cax cha manon no wacax, no icham calnel, c'al no ach'ejtak calnel, yetok masanil tzet yetal chi ak'lay yetok no', axca trigo, ma cebada, c'al vino chi oc yin xajanbalil bay altar yet templo e Diosal bay Jerusalén tu'. ¹⁸Axa ch'en oro c'al ch'en plata chi cancan xin, okxa e yil tzet chi oc e yuj, atac'ala' tzet chi cha c'ul e Diosal. ¹⁹A pax masanil net chi k'anlay yet chi oc ayilal bay templo Dios max ak'lay ayach, ach caw chak' bay a Diosal bay Jerusalén tu'.

²⁰Tzanc'al tzet yetal chi oc yopiso oj bay yin is templo a Diosal tu' chi je' eon eltek is tojol bay in tesorería. ²¹Ayin rey Artajerjes in ti' chi wal bay masanil eb tesorero bay yayubc'ual a' Éufrates: Ak'ek yin aymanil masanil tzet chi k'an Esdras sacerdote, c'al meñtol cuywinak yin ley yet cham Diosal satcan. ²²Chi je' yak'lay 75 quintal plata, 300 quintal trigo, 550 galón vino, 550 galón aceite, c'al masanil atz'am chi k'ana'.

²³Tzanc'al tzet chi k'an cham Diosal satcan yuj is templo, ayman chi ak'lay masanil, yet watx' c'am junok yailal chi jayoc wiban, c'al yiban wuninal, c'al yiban masanil in makbej. ²⁴Cax che yaben cantok tol c'am che k'an ch'en tojlabal c'al waj tumin ma junokxa tojlabal bay eb sacerdote, bay eb levita, bay eb chi bitni, bay eb taynem puerta c'al bay masanil eb ayoc yalan is chekbanilal yet templo Dios.

²⁵Axa pax ach ti' Esdras, atac'ala' a jelanil ak'bil yuj Dios, aoc eb juez c'al eb gobernador chi watx'nen el masanil is k'anej masanil anima ay bay yayubc'ual a' Éufrates. A eb tu' yowalil chi yojtaknej el eb is ley a Diosal tu'; a mac man ojtaknenok ley tu' cha cuyu'. ²⁶A mac c'am chi

iken is ley a Diosal tu' c'al in ley, ayman chi alay oc yailal, ma chi cami, ma chi ilay el yul conobal tu', ma chi ilay ec' tzet yetal ay bay, ma chi oc preso, xi cham rey yin tx'an carta tu'.

Is txaj Esdras

²⁷Max lajwi tu xin, max txajli Esdras: Al-layokab watx' k'anej yin Jehová co Diosal yetok eb jichmam, yujtol a Cham max ak'on yun cham rey tol miman yelapnok templo Jehová bay Jerusalén. ²⁸Yuj is watx'c'ulal Jehová, xan watx' in yul sat cham rey, c'al yul sat eb chi lajtinén k'anej, yetokc'al yul sat masanil anima ay is may yayji oc yikbej bay is c'atan. Yuj tu' xan max in tec'baj in ba in wajban oc eb ikbajwom yayji oc yin is yinatil eb wet israelal, yuj meltzotok eb wetok, xi Esdras.

Listail eb max meltzotok yetok cham Esdras

8 ¹A ton listail eb yajaw yayji xol eb yican ti', atac'ala' tz'ibelay eb yin junjun yinatil, a ton eb max tit wetok bay Babilonia yul tiempoal rey Artajerjes:

²⁻³Gersón, yin yinatil Finees; Daniel, yin yinatil Itamar; Hatús, yin yinatil Secanías, a ton yin yinatil David; Zacarías, yin yinatil Paros; 150 winak tz'ibbil bay is lista eb ajun yetok eb.

⁴Elioenai c'ajol Zeraías, a ton yin yinatil Pahat-moab, 200 winak ajun yetok.

⁵Secanías c'ajol Jahaziel, yin yinatil Zatu, 300 winak ajun yetok.

⁶Ebed c'ajol Jonatán yin yinatil Adín, 50 winak ajun yetok.

⁷Jesafás c'ajol Atalías, yin yinatil Elam, 70 winak ajun yetok.

⁸Zebadías c'ajol Micael, yin yinatil Sefatías, 80 winak ajun yetok.

⁹Obadías c'ajol Jehiel, yin yinatil Joab, 218 winak ajun yetok.

¹⁰Selomit c'ajol Josifías, yin yinatil Bani, 160 winak ajun yetok.

¹¹Zacarías c'ajol Bebai, yin yinatil Bebai, 28 winak ajun yetok.

¹²Johanán c'ajol Hacatán, yin yinatil Azgad, 110 winak ajun yetok.

¹³Elifelet, Jeiel c'al Semaías xol yinatil Adonicam. Yin tzunanil max meltzotek eb yetok 60 winak.

¹⁴Utai c'al Zabud, yin yinatil Bigbai, 70 winak ajun yetok.

Eb max ak'wi serbil bay templo

¹⁵Ayin Esdras in ti', max in wajbaj oc eb ti' bay ti' jun a' aej chi yik Ahava. Oxeb c'ual max on ec' bay tu'. A yet max in k'anlen ec' xol eb anima tu', c'al eb sacerdote, c'am junok levita max ilchaj wuj. ¹⁶Yuj wal tu' xan max wawtejteb eb mimek winak yayji ocok: a ton Eliezer, Ariel, Semaías, Elnatán, Jarib, Elnatán, Natán, Zacarías c'al Mesulam, yetok c'apax eb mextol, a ton Jojarib c'al Elnatán. ¹⁷Max in chektok eb toj il-lay Iddo, a ton yajaw yayji bay jun lugar chi yik Casfia. Max walon masanil tzet yetal tol yowalil chi al-lay bay Iddo

tu', c'al bay masanil eb ayic' yetok bay tu', yetokc'al eb yinatil eb max ak'wi serbil bay templo, cajan bay Casifia tu', yet watx' chi yitek eb eb anima chi je' colwaj yetok bay templo co Diosal. ¹⁸Yuj is colwal Dios max ilaytek Serebías yuj eb, yujtol a jun winak tu' caw wal jalan, yinatil jun levita chi yik Mahli. A jun tu' max titc'al yetok yuninal c'al yetok yuǵtak. Ay waxaklajonwan eb yin masanil. ¹⁹Max yion c'apaxtek eb Hasabías c'al Jesaías. A eb tu' yinatil Merari eb; yetokc'al yuninal eb, c'al yuǵtak eb, ay junc'alwan eb yin masanil.

²⁰Max jay c'apax oc 220 eb yinatil eb max ak'wi serbil bay templo. Atax cham rey David yetok eb ayoc yin opiso yetok, max aon can oc eb yin colwajwomal yetok eb levita. Masanil juntzan eb ti', tz'ibbil is bi eb bay jun lista.

²¹Lajwi tu' max waloni tol chon oc yin c'ajbanc'ulal bay ti a' aej Ahava, yet watx' chi jiy co ba satak co Diosal, c'al co k'anon c'apaxok tol chon yitok Cham yin watx'il, yetok eb juninal, c'al yetok masanil tzet yetal ay ayon. ²²Ayin ti' max in q'uixwi in k'anon soldado bay cham rey, a ton eb soldado toc'al chi beyi, yetok soldado chi aj yiban chej, yet chon is taynej eb bay eb ajc'ul bay yulak be. Ilab tol mayal jal bay cham rey tu', tol a co Diosal chi taynen mactxel tol a bay Cham chi yal ba, palta chi ya wal tok yowal c'ul yiban mactxel chi bekoncanok. ²³Yuj wal tu xin, xan max on oc yin c'ajbanc'ulal c'al co tewi bay Dios. Caw wal max yab Cham co tewilal.

²⁴Lajwi tu' max in sic'on el lajcwaw eb ikbajwom xol eb sacerdote: a ton Serebías, Hasabías c'al yetok lajonwanxa ajun yetok eb. ²⁵Lajwi tu' max wechen ch'en plata c'al ch'en oro yetok ch'en mitx'k'abej, a ton juntzan ch'en max yak' cham rey, yetok eb chi ak'on nabal cham, c'al yetok eb ayoc yin opiso yetok, yetokc'al masanil eb jet israelal ayic' bay tu'. Max wak' juntzan sabalej yet templo co Diosal tu' yul k'ab eb lajcwaw sacerdote tu'. ²⁶Max wechej ch'en plata max wak'on bay eb: 500 quintal ch'en yetok juntzan mitx'k'abej tol plata, 75 quintal yalil, yetok 75 quintal ch'en oro; ²⁷yetok 20 sec' ch'en oro, tol ay 17 libra yalil, yetok cab mitx'k'abej tol bronze caw wal watx' cawxi, lajan is tojol axca mitx'k'abej oro.

²⁸Lajwi tu' max walon bay eb axca ti': Ayex ti' sic'bil exxa el yin e yocan yul k'ab Jehová, ac'ala' yet-xa Cham ch'en oro, ch'en plata, c'al masanil mitx'k'abej tol max salay bay Cham, a ton co Diosal yetok eb jichmam. ²⁹Taynejek wal ch'en masantac'al ok echelay ch'en satak eb yajawilal eb sacerdote, c'al satak eb levita, c'al satak eb yajaw yayji xol yican xol eb jet israelal, a ton bay yulak is cuartoal templo bay Jerusalén, quin chi bay eb. ³⁰Caytu' max yun chaon eb sacerdote c'al eb levita tu' ch'en plata c'al ch'en oro, yetokc'al mitx'k'abej tol mayal echelay tu'. Max yiontok eb bay Jerusalén bay is templo Jehová co Diosal.

³¹A yet 12 waay yet babel xajaw max on el bay ti a' aej Ahava yet t'inanxac'al max juttek co ba bay Jerusalén ti'. A co Dios max on colon el bay eb ajc'ul, c'al bay eb elk'om bay yulak be. ³²A yet max on jayoc bay Jerusalén ti', oxeb c'u max on xewi. ³³Axa yet is can c'ual xin, max con toj bay templo co Diosal yuj

yechelay ch'en plata c'al ch'en oro, yetokc'al jantak mitx'k'abej yet templo co Diosal. Lajwi tu' max ak'lay bay cham sacerdote chi yik Meremot, c'ajol Urías. Ay c'apax ec' Eleazar yetok, a ton is c'ajol Finees, yetok eb levita, a ton Jozabad c'ajol Josué, c'al Noadías c'ajol Binuy. ³⁴A yet jun c'ual tu', max echelayi c'al bislay masanil, tz'akan yayji; caytu' max yun tz'ibelaycan ch'en masanil.

³⁵Lajwi tu xin, a masanil eb meltzojnaktek yin presoal max yak'on eb no no' tol chi tz'a yin xajanbalil bay co Diosal ayon israel on ti'. Max ak'lay lajcwac'on no ach'ej wacax, yuj chi ak'lay tz'a juj co masanil, yetok 96 icham calnel, yetok 77 no ach'ej calnel, yetok c'apax lajcwac'on no mam chiwo, yuj xajanbal yuj yak'lay tan mulej. Masanil juntzan tu' max ak'lay tz'a satak Jehová. ³⁶Lajwi tu' max ak'lay tx'an un yet cham rey bay eb ayoc yin yajawilal bay yetc'ulal yayubc'ual a' Éufrates, xan axa jun eb max colwaj jetok yin mulnajil yin templo co Diosal.

Mul eb conob c'al txaj cham Esdras

9 ¹A yet max lajwi juntzan tu' max jayoc eb yajaw yayji bay tu' in c'atan, max yalon eb ayin axca ti': Xiwil eb jet israelal, toltax ajun eb sacerdote c'al eb levita yetok eb, c'am chi pojil ba eb xol eb tx'ok conobal cajan bay jun nación ti', palta chi beybalnej eb is yob beybalil eb cananeo, eb hitita, eb ferezeo, eb jebuseo, eb amonita, eb moabita, eb egipcio c'al eb amorreo. ²A eb tu' yetokc'al is c'ajol, lanan yilen aj ba eb yetok is cutz'in juntzan anima tu'; yuj tu' xan a is conob Dios mayal somtok ba xol juntzanxa tx'ok conobal tu'. A wal eb babel max yaoc is mul tu', a ton eb yajaw yayji co xol, xi eb ayin.

³A yet max waben juntzan k'anej tu' max in tzilontok in pichil, max in jatzon el in xil c'al xil in ti' yuj in tx'oxon el in cusc'ulal, cax max in ay chotan yin manxa animaok ay in c'ul. ⁴Max wajbaj oc ba wetok masanil eb tol chi xiw yuj k'anej Dios yalnak yin is mul eb jet israelal, eb meltzojnaktek yin presoal. Palta ayin ti' max in ayc'al chotan yin tol manxa animaok ay in c'ul, masantac'al yet yorail xajanbal yet yayc'ualil. ⁵A wal yet jun bek tu', max in aj wan bay chotan in ay tu', axa way jajan in txajli, c'al wion aj in k'ab bay satak Jehová in Diosal, yetokc'al in pichil tzilquihtak tu'. ⁶Max walon bay axca ti': Ach in Diosal, caw wal chin q'uixwi ayach, yobxac'al chi wabej, c'amxa chi nachaj wuj tzet chi wut walon in ba ayach, yujtol yelxac'al max ec' yiban co yobtakil on. A co mul on tu' max ajtac'al apnok bay satcan. ⁷Yettaxc'al is tiempoal eb jichmam on, masantac'al tinani', caw wal ayonc'al oc yin co yobtakilal on. Max on alay oc yul k'ab is reyal juntzanxa nacionlak yetok eb co reyal c'al eb sacerdote, yujc'al wal ton co yobtakilal on yetok eb. Max on ak'lay camok, max on ilaytok yin presoal, max elk'anelay co tzetak yetal, caw wal q'uixwiltak max juncanok, axca wal yayji ec' tinani'. ⁸Palta tinani' xin, ach Jehová co Diosal, a yuj a camc'ulal, xan caxc'al jun botzan on ayon ti', chi je' co watx'nen pax ay cajan co ba junelxa bay sat tx'otx' tx'otx' tol et yayji ocok. Ach max ak' pax co tzalojc'ulal junelxa,

max on ak' wal xew junok bek bay ayon oc yin mosejal. ⁹Caxc'al mi tol mosejal jayji, palta majc'al on a beccan bay ayon oc yin mosejal tu'. Max ak' yun eb reyala Persia, tol watax' max yut eb c'ul jin. Max ak' co cawil yet max co ca watax'nen aj a templo, yujtol uchchajnaktok, max on a taynej bay Judá c'al bay Jerusalén ti'.

¹⁰Palta a tinani' xin, ach co Diosal, ¿tsetto wal chi je' jalon ayach yet mayal oc co mul ti'? Tokwal max jikej a chekbanil, ¹¹a ton tzet max ak' yal eb a chekbej, eb chach ak'on serbil. Ach ti' max al ayon tol junelnej caw wal yob is beybal juntzan anima cajan bay jun conob ok ji', nojnaxxac'al el yul is naci6n eb tu' yuj beybalej man watax'ok. ¹²Yetok c'apaxok max ala' tol c'am chi jak' yilej ba eb ix co cutz'in yetok eb is c'ajol eb, tamwal eb co c'ajol chi jak' yilej ba yetok eb ix cutz'in eb. Max alon c'apaxok tol c'am chon colwaj yetok eb anima tu' yin yaj can eb yin watax'ilal, yet watax' tec'anc'al chi jut co ba bay jun conob tu', cax chi jak'on tzalobjbok co c'ul yin a camc'ulal, yet watax' chi cancan tx'otx' sataknej eb jinatil yin junelnej.

¹³A wal yuj co yobtakilal max oc a satak, xan max ec'tok juntzan yailal ti' jiban, palta ach ti', ach co Diosal, txennej max yun aon oc yailal jiban, man wal axcaok is mojalil co yobtakil max oqui. Chito wal el yin a c'ul chon iquisbi can ec' jaywanokxa on. ¹⁴Ta chi jut co ba tenomtakil ayach junelxa, c'al co junanen co ba yetok juntzan tx'ok animail tol caw wal yobtak is beybal tu', ¿jantakto wal man ok tit owal jin, cax chon ak'on c'ayilok? Mojxac'al mi tol c'amxa junok on chonto iquisbi canok.

¹⁵Mamin Jehová, co Diosal ayon israel on ti', caw wal tojlc'al tzet chonej, palta ach max el yin a c'ul tol chon iquisbican ec' jaywanokxa on. Yuj tu xin, xan chi jalil co mul a satak, caxc'al man co mojok jayji ec' a satak, quin chi bay Cham.

Max ilay el eb ix ix tx'ok conobal xol eb

10 ¹Yak'ban chi txajli cham Esdras, c'al yalon masanil juntzan ti', cax chi ok'i, jajan ay bay satak templo Dios, max oc oyan jun miman bulan eb yet israelal yin, eb winak, eb ix ix, c'al eb unin. Caw wal chi ok' c'apax eb yetok. ²Lajwi tu', a Secanías c'ajol Jehiel yin yinatil Elam, max k'anjab bay Esdras axca ti', max yaloni: Ayon ti' caw wal man ikemok on bay co Diosal, yujtol max jilej co ba yetok eb ix ix tx'ok conobal, tx'ok is diosal, palta xin, ayto wal tzet watax' chi jut co ba, yet watax' chon ak'lay mimanc'ulal yuj co Diosal. ³A tinani' xin, ok jak' co ti' tol ok co chek pax eb xal jistzil tx'ok conobal tu' yetokc'al yune' eb xal, tol ok jikej tzet chal ach ti', yetok juntzanokxa eb chi iken is chekbanil Dios etok. Yunokab axca yalon is ley Cham. ⁴Yuj tu' xan ajan wanok. Ach ti' ay alon et a watax'nen el jun ti'. Ok on oc etok. Ak' ep, ocok on yin jun k'anej ti', xi.

⁵Xan max aj wan cham Esdras, max yak'on eb is ti' satak Dios yuj cham, tol chi yun axca max yal Secanías. Xan max yak' eb sacerdote, eb levita, c'al eb yet israelal eb tu' is ti'. ⁶Lajwi tu' max el cham Esdras bay

satak templo, max toj bay is cuarto Johanán, a ton is c'ajol Eliasib. A bay tu' max ec' ak'bal yuj yin tol maj lowok tamwal yuq'uena', yujtol caw wal max cusc'ul yuj is mul eb meltzojnaktek yin presoal.

⁷Lajwi tu' max oc jun awtebal bay masanil eb anima ay bay Judá c'al bay Jerusalén, yet chi wajbaj oc ba eb bay Jerusalén tu', masanil eb meltzojnaktek yin presoal. ⁸Ta ay mactxel c'am chi apni oc yin yet yox c'ual, atac'ala' max yun yalon eb yajaw c'al eb aom oc nabalej, chi ilay ec' is tx'otx' cax chi ilay el xol eb meltzojnaktek yin presoal tu'. ⁹Yuj wal tu xin, a yin oxebxa c'ual tu' max wajbaj oc ba bay Jerusalén masanil eb winak yet Judá c'al yet Benjamín, a ton yet 20 waay yet is baloneb xajaw. Max apni oc eb masanil bay templo Dios; caw wal chi bil eb yuj xiwilal yuj jun k'anej tu', c'al yuj nab chi ayi.

¹⁰Lajwi tu xin, max aj wan cham sacerdote Esdras max yalon bay eb axca ti':

—Ayex ti' max oc e mul yujtol max e yilej e ba yetok eb ix ix tx'ok conobal. Caytu' max yun e yiontek yobtakil jiban. ¹¹Yuj wal tu xin, alek ajtek e mul satak wal is Diosal eb jichmam jetok cax che yiken yochwan Cham. Pojek el e ba xol eb anima tx'ok conobal cajan co cawilal ti', c'al e bekoncan eb xal ix tx'ok conobal tu', xi cham Esdras.

¹²Masanil anima tu' max aj yaw yin ipejal, max yalon axca ti':

—Ok jikej junen axca chal tu'. ¹³Palta c'amc'al chi bek pax yak'on nab. C'am chi je' co cancan bay yulak calle ti', yujtol a jun k'anej ti', man asanok jun cabok c'ual ok yitok, yujtol xiwil on max oc co mul axca tu'. ¹⁴Watx' mi tatol asan eb co yajawil chi cancan cayti' yin watx'nencan el jun k'anej ti'; axa masanil mactxel cajan bay yulak co conobal, tol max yilej ba yetok eb ix ix tx'ok conobal tu', chi jayoc eb yet junok c'ual tol txequel chi yuncanok, ibilokab oc eb yuj eb juez, c'al yuj eb yicham winakil conob tu'. Cac'al tu' ok jun co masanil, masantac'al ok yal tan yowal c'ul co Diosal jin, yuj jun k'anej ti', xi eb.

¹⁵⁻¹⁶A masanil eb meltzojnaktek yin presoal max cha c'ul eb jun k'anej tu', palta asan Jonatán c'ajol Asael, yetok Jahasías, c'ajol Ticba maj cha c'ul eb. Max oc c'apax Mesulam c'al Sabetai levita yetok eb. Yuj tu' max yaoc cham sacerdote Esdras juntzan eb winak tol yajaw yayji xol eb yican. A ton yet babel c'ual yet lajoneb xajaw, a masanil juntzan max yaoc tu' max waj ba eb masanil yul despacho yuj beyc'ulnen eb junjun k'anej. ¹⁷Axa yet babel c'ual yet babel xajaw, a yet tu' max lajwi beyc'ulnen eb masanil eb max yilej ba yetok eb ix ix tx'ok conobal tu'.

¹⁸A ton listail eb max yilej ba yetok eb ix ix tx'ok conobal tu': A xol yinatil eb sacerdote c'al xol eb yican Josué, c'ajol Josadac: a ton Maasías, Eliezer, Jarib c'al Gedalías. ¹⁹A eb tu' max yak' wal eb ti' chekon pax eb xal ix tu', max yak'on eb junjun no icham calnel yin ofrendail yuj is mul.

²⁰Xol eb yinatil Imer: a ton Hanani c'al Zebadías.

²¹Xol eb yinatil Harim: a ton Maasías, Elías, Semaías, Jehiel c'al Uzías.

²²Xol eb yinatil Pasur: a ton Elioenai, Maasías, Ismael, Natanael,

Jozabad c'al Elasa.

²³Axa xol eb yinatil eb levita: a ton Jozabad, Simei, Kelaía, (ac'al oc chi yik Kelita) Petaías, Judá c'al Eliezer.

²⁴Axa xol eb chi bitni: a ton Eliasib. Xol eb taynem puerta: a ton Salum, Telem, c'al Uri.

²⁵Axa xol jutzanza eb yet israelal, a ton eb ti' max yilej ba yetok eb xal tx'ok conobal tu': a xol is yinatil Paros: a ton Ramía, Jezías, Malquías, Mijamín, Eleazar, Malquías, c'al Benaía.

²⁶Axa xol eb yinatil Elam: a ton Matanías, Zacarías, Jehiel, Abdi, Jeremot c'al Elías.

²⁷Axa xol eb yinatil Zatu: a ton Elioenai, Eliasib, Matanías, Jeremot, Zabad c'al Aziza.

²⁸Axa xol eb yinatil Bebai: a ton Johanán, Hananías, Zabai c'al Atlai.

²⁹Axa xol eb yinatil Bani: a ton Mesulam, Maluc, Adaía, Jasub, Seal c'al Ramot.

³⁰Axa xol eb yinatil Pahat-moab: a ton Adna, Quelal, Benaía, Maasías, Matanías, Bezaleel, Binuy c'al Manasés.

³¹Axa xol eb yinatil Harim: a ton Eliezer, Isías, Malquías, Semaías, Simeón. ³²Benjamín, Maluc c'al Semarías.

³³Axa xol eb yinatil Hasum: a ton Matenai, Matata, Zabad, Elifelet, Jeremai, Manasés c'al Simei.

³⁴Axa xol eb yinatil Bani: a ton Madai, Amram, Uel, ³⁵Benaía, Bedías, Queluhi, ³⁶Banías, Meremot, Eliasib, ³⁷Matanías, Matenai c'al Jaasai.

³⁸Axa xol eb yinatil Binuy: a ton Simei, ³⁹Selemías, Natán, Adaía, ⁴⁰Macnadebai, Sasai, Sarai, ⁴¹Azareel, Selemías, Semarías, ⁴²Salum, Amarías c'al José.

⁴³Axa xol eb yinatil Nebo: a ton Jeiel, Matatías, Zabad, Zebina, Jadau, Joel c'al Benaía.

⁴⁴A masanil jutzan ti' max yilej ba eb yetok eb xal ix tx'ok conobal, ay eb ayxa yuninal yetok eb xal tu'.